

ጳውሎሲ ቆሮንቶሳ አሳስ ፃፊዳ ናምዓንሶ ኪታ ጋላ ቆፋ

ጳውሎሲ ቆሮንቶሳ አሳስ ፃፊዳ ናምዓንሶ ኪታይ ፃፊቲዳይ፥ ኢያው ቆሮንቶሳ ምሳ ኬሳራ ዴሲያ ጋሄቴሳይ ዳሮ ሜቶ ጊዶ ጌሊዲ ዴሲያ ምዴና። ኢሲ ኢሲ ምሳ ኬሳ አሳቲ ጳውሎሳ ኢታ ቦሬ ቦሪኮካ ጳውሎሲ ሲጋ ሜዳናው ኢያው አሞይ ዴዔይሳ ቤሲስ። ሄሲ ሃኒያ ምዴ ጊታ ኡፋይሳ ኡፋይታናው ዳንዳዔይሳ ቆንጨሴስ።

ጳውሎሲ ባ ኪታን ኮይሮ ኪፊሊያን፥ ቆሮንቶሳ ምሳ ኬሳራ ኢያው ዴሲያ ጋሄቴሳ ቆንጨሲዲ፥ ምሳ ኬሳን ሜዴቲዳ ቦሪያሲኔ ኢፀቀስ አይስ ሚኖ ዛሮ ኢሚዳኮ ኦዴስ። ሄሳራ ጋሲዲ ኢያ ሴራይ ኤንታ ናጋራፔ ዛሪዲ ሲጋን ጋሲዳ ጊሾ ኢ ኡፋይቲዳ ኡፋይሳ ኤንታው ቆንጨሴስ። ካሊዲካ፥ ዩሁዳን ዴሲያ አማኒያ አሳ ማዳናው ባንታው ዴሲያባፔ ጮ ኢማና ሜላ ሃሳይሴስ። ወርሴሳ ሽምፖታን ጳውሎሲ ባ ሃሞሬቴሳ ቦላ ዴንዲዳ ሞቱዋስ ዛሮ ኢሜስ። ጋሶይካ፥ ቆሮንቶሳ ምሳ ኬሳን ዴሲያ ኢሲ ኢሲ አሳቲ ባንታና፥ «ቱማ ሃሞሬ» ኦሲዲ፥ «ጳውሎሳ ምርዳንቾ ሃሞሬ» ኦሲዲ ሞቶሶና።

2 ቆሮንቶሳ ኪታ አይፊ ቆፋታ

ጌሎ ቆፋ 1:1-11

ጳውሎሳኔ ቆሮንቶሳ ምሳ ኬሳ 1:12-7:16

ዩሁዳን ዴሲያ አማኒያ አሳ ማዴ 8:1-9:15

ጳውሎሲ ባ ሃሞሬቴሳ ማታስ ኢሚዳ ዛሮ 10:1-13:10

ኩሻ ቆፋ 13:11-14

1 ምሳ ሽኔን ዩሱስ ኪሪስቶሳ ሃሞሬ ጊዲዳ ጳውሎሲኔ፥ ኑ ኢሻ ጊሞቲዮሲ፥

ቆሮንቶሳን ዴሲያ ምሳ ምሳ ኬሳሲኔ አካያ ቢታን ዴሲያ ምሳ አሳ ኡባስ ፃፊዳ ኪታ።

2 ምሳ ኑ አሞፔኔ ንዳ ዩሱስ ኪሪስቶሳፔ፥ አጅ ኬሃቴሳይኔ ሳሮቴሳይ ሂንቴው ጊዶ።

ጳውሎሲ ምሳ ጋላቴስ

3 ማሮቴሳ አዋስ፣ ኡባ ዎዴ ኑና ሚንጴሲያ ያሳስ፣ ኑ ጎዳ ዩሱስ ኪሪስቶሳ አዋስ ጋላቲ ጊዶ። 4 ያሳይ ኑስ ኢሚዳ ሚንጴሱዋን፣ ሜቶን ዴዔይሳታ ኑ ሚንጴሳና ሜላ ያሳይ ኑና ኑ ሜቶ ኡባን ሚንጴሴስ። 5 ኑኒ ኪሪስቶሳ ዳሮ ዋያ ሻኬቲዳይሳዳ ቃሲ ኑኒ ኢያ ዳሮ ሚንጴሱዋን ሚናና። 6 ኑኒ ዋዬቲኮ ሄሲ ሂንቴና ሚንጴሳናሳኔ ሂንቴና አሻናሳ። ቃሲ ኑኒ ሚኔቲኮ ኑኒ ጌንጩዳ ዋያ ሜላ ሂንቴካ ጌንጩዳ፣ ያሳይ ሂንቴው ኢሚያ ሚንጴሱዋን ሚናና። 7 ሂንቴ ኑ ኤኪዳ ሜቱዋ ሜላ ኤኪዳ፣ ኑ ሚንጴሱዋን ሻኬታናይሳ ኑ ኤሪያ ጊሾ ኑ ኡፋይሳይ ሂንቴናን ሚና።

8 ኑ ኢሻቶ፣ ኢሲያ ቢታን ኑና ጋኪዳ ሜቱዋ ሂንቴ ኤራና ሜላ ኮዮስ፣ ሄ ኑና ጋኪዳ ሜቶይ ኑ ዎልቃፌ ዳሪን፣ ሃይቆና አቶኮ ጊዲ ኡፋይሲ ቃንጊዳሺን። 9 ኑኒ ኑ ቦላ ሃይቆ ፐርዲ ፐርዴቲዳ ሜላ ቆፐዳ። ሺን ኑኒ ኑ ሁዔን ጊዶናሺን፣ ሃይቂዳይሳታ ዴንሲያ ያሳን አማኔታና ሜላ ሄሲ ሃኒስ። 10 ያሳይ ሄሳ ሜላ ኢታ ሃይቆፔ ኑና አሺስ፤ ሃዒካ አሻና፤ ሲንሳፌካ ኢ ኑና አሻና ጊዲ ኢያን ኡፋይሲ ዎሶስ። 11 ዎሳን ኑና ማዲቴ። ዳሮ ዎሳ ጋሶን ያሳ ማዱዋ ኑ ዴሚያ ዎዴ ዳሮ አሳይ ኑ ጊሾ ያሳ ጋላቶሶና።

ጳውሎሲ ባናው ቆፐዳ ቆፋ ላሚስ

12 ኑኒ ኑ ጌሻ ካሃን ጨቁቶስ። ኑኒ ሃ አላሚያን ዴዒዳ ዴዑዋን ኡባራካ ኑ ዴዒዳ ዴዑዋን ቱማቴሳኒኔ ሱሬቴሳን ሂንቴራ ዴዒዳ። ሄሲካ፣ ሃ አላሚያ ጩንጫቴሳን ጊዶናሺን ያሳ አዶ ኬሃቴሳና። 13 ኑ ሂንቴው ግፌዳ ዳብዳቤይ ሂንቴ ናባባናዉኔ አኬካናው ዳንዳዲያባፕ አቲን ሃራ ጊዴና። ሂንቴ ኢያ አኬካናው ዳንዳዴይሳ ታ አማናይስ። 14 ሃዒ ሂንቴ ኑና ሃኒዳ ኬና ኤራታ፣ ሺን ሲንሳፌ ኩሜሴ ኤራናይሳ ታ አማኔታይስ። ኑ ጎዳ ዩሱሲ ሲሚያ ዎዴ ኑኒ ሂንቴናን ጨቁቲዳይሳዳ ሂንቴካ ኑናን ጨቁታና።

15 ሄሳ ታኒ ሎይሳ ኤሪዳ ጊሾ ሂንቴ ናዎግንሶ ጎዔታና ሜላ ካሴታዳ ሂንቴኮ ባናው ቆፋ ቃቻስ። 16 ታኒ ማቂዶኒያ ባሽኔ ያፔ ሲማሽ ሂንቴና ቤዓና። ታኒ ያፔ ዩሁዳ ቢያ ዎዴ ሂንቴ ታና ታ ኦጊያን ማዳና ጋዳ ቆፓስ። 17 ታኒ ሄሳ ጋሼ አይ አሳናው ቤሲያኮ ኤሮና አሲ ዳናይና? ዎይኮ ታኒ ታ ቆፋ ቃቻያ ዎዴ አሳ ቆፋዳ፣ ኢሲ ቶሆ «ኤ» ቃሲ ኢሲ ቶሆ «አካይ» ጊያ አሳ ሜሴዬ?

18 ሺን ያሳይ አማኔቱይሳ ጊዲያ ጊሾ ኑ ሂንቴው አዲያ ቃላይ «ኤ» ዎይኮ «አካይ» ጌይሳ ጊዴና። 19 ታኒ፣ ሲላሴይኔ ጊሞቲዮሲ ሂንቴው ማርካቲዳ ያሳ ናዓይ፣ ዩሱስ ኪሪስቶሲ ኡባ ዎዴ «ኤፔ» አቲን «ኤ» ኔ «አካይ» ጊዴና። 20 ያሳይ ኢማና ጊዳ ኡባይ

ኪሪስቶስ ባጋራ «ኤ» ጊዴስ። ኑኒ ኪሪስቶስ ባጋራ ያሳ ቦንቾስ፥ «አሚን» ጊዴ ሄሳ ጊሾሳ። ²¹ ኑኒ ሂንቴ ኪሪስቶስን ሚኒዲ ኤቃና ሜላ አሲዳይኔ ባ አሱዋስ ዶሪዳይ ያሳ። ²² ኑኒ ኢያባ ጊዴይሳ ኤሪሳናው ባ ማታሚያ ኑ ቦላ ዎሲስ፤ ቃሲ ባ ጊሻ አያና አይሲ አሲዲ ኑ ዎዛናን ዎሲስ።

²³ ታኒ ቆሮንቶሳ ቦና አጊዳይ ሂንቴ አዛኖና አታና ሜላሳ፤ ሄሲ ዎርዶ ጊዲኮ ያሳይ ታ ሼምፑዋ ታፔ ኤኮ። ²⁴ ሂንቴ፥ ሂንቴ አማኑዋን ሚኒዲ ዴዲያ ጊሾ ኑ ሂንቴና ኡፋይሳናው ሂንቴራ ኢሲፌ አሴይሳታፔ አቲን ሂንቴና ዎልቃን አማንሴይሳታ ጊዶኮ።

2

¹ ታኒ ናምግንሶ ሂንቴኮ ቢኬ ጋዳ ቆፋ ቃቺዳይ ሂንቴና አዛንሶና አጋናሳ። ² ታኒ ሂንቴና አዛንሴኮካ ታ አዛንሴዳ ሂንቴፌ ሃሪ ታና ኡፋይሳናው ዴዴይ አኔ? ³ ታኒ ሂንቴው ሄ ዳብዳቢያ ፃፊዳይ፥ ታ ሂንቴና ቤግናው ቢያ ዎዴ ታና ኡፋይሳናው ቤሲያ አሳን ታ አዛናናው ኮዮና ጊሾሳ። ታ ኡፋይቲያ ዎዴ ሂንቴ ኡባይካ ኡፋይታናይሳ ታ አማናይስ። ⁴ ታኒ ዳሮ ዋዩኒኔ ኡንግን ቃሲ ዳሮ አፋሳን ፃፊዳይ፥ ሂንቴና አዛንሳናሳ ጊዶናሺን ታኒ ሂንቴና ኡባ አይ ሜላ ዶሲያኮ ሂንቴና ኤሪሳና ሜላሳ።

ቆሂዳይሳ ማሮባ

⁵ አሴ አዛንሴዳ አኒካ ዴዲኮ ታ ኢያ ባላ ዳርሳናው ኮዩኬፌ አቲን ታና ጊዶናሺን ሂንቴፌ ዳሮታ አዛንሴስ። ⁶ ሂንቴፌ ዳሪያ አሳይ ሄ ኡራ ሴሪዳ ሴራይ ኢያው ጊዳና። ⁷ ሄሳ ጊሾ፥ ሄ ኡራይ ዳሮ አዛኒዲ፥ ኡፋይሲ ቃንዎና ሜላ ሂንቴ ኢያ ማራናውኔ ሚንሴሳናው ቤሴስ። ⁸ ሂንቴ ኢያ ሲቄይሳ ዛሪ ኢያው ቆንጨሳና ሜላ ታ ሂንቴና ዎሳይስ። ⁹ ታ ሄ ዳብዳቢያ ሂንቴው ፃፊዳይ፥ ሂንቴ ፓጩቲዲ፥ ኡባባን ታው ኪቴቴይሳ ኤራናው ኮዩዳ ጊሾሳ። ¹⁰ ሂንቴ ማሪያ ኡራ ታካ ማራና። ታኒ ማራናባይ አይቢ ዴዲኮካ፥ ኪሪስቶስ ሲንሳን ሂንቴ ጊሾ ጋዳ ማራስ። ¹¹ ታኒ ሄሳ አሲዳይ ፃላሂያ ጨዋ አሱዋ ኑ ኤሪያ ጊሾ ፃላሄን ጨሜቶና አታና ሜላሳ።

ዲሮግዳን ጳውሎሳ ኡንዔቴሳ

¹² ታኒ ኪሪስቶስ ዎንጌላ ሳባካናው ዲሮግዳ ቢዳ ዎዴ ንዳይ ያን ታው አሶ አጌ ጊጊሲዲ ዎሲስ። ¹³ ሺን ታኒ ታ ኢሻ ቲቶ ያን ዴማቦና ጊሾ ታ ዎዛናይ ሼምፐቤና። ሄሳ ጊሾ፥ ያን ዴዲያ አሳ ሳሮሳዳ ኢያ ኮያናው ማቄዶኒያ ባስ።

14 ሺን ኪሪስቶሳ ባጋራ ኡባ ዎዴ ኑና ዎኖን ካሌሲያኔ ሺቶ ሜላ ሳዊያ ኪሪስቶሳባ ኑ ኤሪያ ቲሚርቲያ ኡባ ቤሲ ጋላና ሜላ አሲያ ዎሳ ጋላቲ ጋቱ። 15 ኑኒ አቲያ አሳ ጊዶኒኔ ዳያ አሳ ጊዶን ኪሪስቶሳ ባጋራ ዎሳስ ኢሜቲዳ ሳዊያ ሺቶ ሜላ። 16 ዳያ አሳስ ሃይቆኮ ኤፊያ ሃይቆ ፔኖ፤ ቃሲ አቲያ አሳስ ዴዎኮ ኤፊያ ዴዎ ሳዎ፤ ያቲን፥ ሄሳ ሜላ አሱዋስ ጊዳናይ አኔ? 17 ኑኒ ዎሳ ቃላ ዎዴ ዴማናው ኮዩዲ ዋላኪዲ ዛልዲያ ዳሮ አሳ ሜላ ጊዶኮ። ሺን ዎሳይ ኪቲዳ ሱሬ አሳታ ሜላ ኪሪስቶሳን ዴዲዲ ዎሳ ሲንሳን ቃላ አዶስ።

3

አራሳ ጫቁዋ አሳንቾታ

1 ኑኒ ዛሪዲ ኑና ሳቢኖዬ? ዎይኮ ሃራ አሳዳ፥ ሳባ ዳብዳቢያ ሂንቴው ዬዳናው ዎይኮ ሂንቴፌ ኤካናው ኑና ኮሺዬ? 2 አሲ ኡባይ ሂንቴና ኤራና ሜላኔ ናባባና ሜላ ሂንቴ ኑ ዎዛናን ሃፌቲዲ ዴዲያ ኑ ዳብዳቢ። 3 ሂንቴ ቃላሜን ጊዶናሺን ዴዎ ዎሳ አያናን፥ ሹቻ ቦላ ጊዶናሺን አሳ ዎዛናን ሃፌቲዳይሳታኔ ኑናን ሃጋዜቲዳ ኪሪስቶሳ ዳብዳቢ ጊዴይሳ ቤሲዴታ።

4 ኑ ሄሳ ጊዳይ፥ ኪሪስቶሳ ባጋራ ዎሳን አማኖይ ኑስ ዴዲያ ጊሾሳ። 5 ኑ ሄሳ አሳናው ዳንዳዲዳይ ዎሳ ዎልቃናፔ አቲን ኑኒ ኑ ዎልቃን አይኮካ አሳናው ዳንዳዎኮ። 6 ኑ አራሳ ጫቁዋ አሳንቾታ ጊዳና ሜላ ዎሳይ ኑና ዳንዳዲሲስ። ሄ አራሳ ጫቆይ ጊሻ አያናን ቤንቲዳይሳፌ አቲን ሃፌቲዳ ሂንገን ጊዴና። ሂንይ ዎዴስ፥ ሺን ጊሻ አያናይ ዴዎ ኢሜስ።

7 ሹቻ ቦላ ሃፌቲዳ ሂንይ ኢሜቲያ ዎዴ ዎሳ ቦንቾይ ቆንጨስ። ሙሴ ሶምዑዋን ዴዲያ ቦንቾይ ዳዩሼ ቢያባ ጊዲኮካ፥ ኢስራዔሌ አሳይ ኢያ ሶምዑዋ ቲሺ አሲዲ ያላናው ዳንዳዲቦኮና። ሂዛ፥ ሃይቆ ኤሂያ ሂንይ ሄሳ ሜላ ቦንቾን ቆንጨኮ። 8 ያቲን፥ ጊሻ አያናን አሴቲያ አሱዋ ቦንቾይ ዋኒዲ አዴኔ? 9 አሳ ቦላ ፐርዳ ኤሂያ ሂንይ ቦንቾ ጊዲኮ ያቲን፥ አሴ ያሊሲያ አራሳ አንይ ዋኒዲ አዴዲ ቦንቾቲኔ? 10 ካሴ ቦንቾ ጊዲዳይሳ ሃዲ አዴያ ቦንቾይ ዴዴይሳራ ጋሲ ቤዲያ ዎዴ ቦንቾይ ባይናባ ጊዲስ። 11 ጉላ ዎዴስ ቆንጨዲ ጉዩፔ ዳይዳይሲ ሃይሳዳ ቦንቾቲኮ፥ ሜሪናው ዴዴይሲ ዋኒዲ አዴዲ ቦንቾቲኔ?

12 ኑስ ሃይሳ ሜላ ኡፋይሳይ ዴዲያ ጊሾ ዩላቶና አዴቶስ። 13 ኑኒ፥ ኢስራዔሌ አሳይ ዳዩሼ ቢያ ቦንቾዋ ዉርሴሳ ቤያና

3:3 ኪሳ 24:12፤ ኤር 31:33፤ ሂዝ 11:19፤ 36:26 3:6 ኤር 31:31 3:7 ኪሳ 34:29

ሜላ ባ ሶምዑዋ ካሚዳ ሙሴ ሜላ ጊደኮ። 14 ሺን ኤንታ ዎዛናይ ዶጪስ። ሃቺ ጋካናው ኤንቲ ጋልዓ ጫቁዋ ናባቢያ ዎዴ ኤንታ ዎዛናይ ሄ ካማን ካሜቲ ዴዔስ። ሄ ካማይ ኪሪስቶሳ ሃላላን ቃሬቱስ። 15 ሺን ሃቺ ጋካናው ኤንቲ ሙሴ ማፃፉ ናባቢያ ዎዴ ኡባን ሄ ካማይ ኤንታ ዎዛና ካሜስ። 16 ሺን ኦኒካ ጎዳኮ ሲሚያ ዎዴ አውዴካ ሄ ካማይ ቃሬቱስ። 17 ጎዳይ አያና፤ ጎዳ አያናይ ዴዒያ ቤሳን ላዓቲሲ ዴዔስ። 18 ኦኒ ኡባይ ካሜቲቦና ሶምዎን ጎዳ ቦንቹዋ ቤዓና። * ኦኒ አያና ጊዲዳ ጎዳ ማላ ዳናናው ቦንቹፊ ቦንቹን ላሜታና።

4

ቱማ ሃዋሬቴሳ አሱዋ

1 ሂዛ፣ ያሳይ ባ ማሮቴሳን ሃ አሱዋ ኑስ ኢሚዳ ጊሾ ኦኒ ኡፋይሲ ቃንዎኮ። 2 ኦኒ ዩላያ ጌማ አሶ ኡባ አጊዳ፤ ጌኔ አሶ አሶኮ፤ ያሳ ቃላ ዎርዶራ ዋላኮኮ። ቱማ ቆንጩን ሃሳዩሼ፣ አሳ ኡባ ካሃይ ኦና ኤካና ሜላ ያሳ ሲንሳን ኦና ሺሾስ።

3 ኦ ኦዲያ ዎንጌላይ ጌሚዳባ ጊዲኮካ፣ ጌሚዳይ ጳዮ አጌን ዴዒያ አሳሳ። 4 ሃ አላሚያ ሃሪያ ያሳይ አማናና አሳ ዎዛና ጎዚስ። ኤንቲ ያሳ ማላን ቆንጪዳ ኪሪስቶሳ ቦንቹ ዎንጌላ ፖዑዋ ቤዎና ሜላ ዲጊስ። 5 ኦኒ፣ ዩሱስ ኪሪስቶሲ ጎዳ ጊዴይሳኔ ኦ ኢያ ጊሾ ሂንቴ አሳንቹ ጊዴይሳ አዶሲፔ አቲን ኦባ አዶኮ። 6 «ዲማን ፖዶይ ፖዶ» ጊዳ ያሳይ፣ ኪሪስቶሳ ሶምዑዋን ፖዲያ ያሳ ቦንቹዋ ኤራ ፖዑዋ ኢማናው ባ ፖዑዋ ኦ ዎዛናን ፖዲሲስ።

7 ሺን ኡባፊ አዲያ ዎልቃይ ኦባ ጊዶናሺን ያሳባ ጊዴይሳ ቤሳናው ሃ ቦንቹ ሻሎይ ሜቃ ሚሼ * ጊዲዳ ኦ አሳቴሳን ዴዔስ።

8 ኦ ኡባ ባጋራካ ዋዩቲዳ፣ ሺን ሜቁሬቲቦኮ። ኦስ ሃዲርሲ ጊዲስ፣ ሺን ኡፋይሲ ቃንዎኮኮ። 9 ኦ፣ ዋርኬታን ጎዴቲዳ፣ ሺን ላጌ ጳዩቦኮ። ኦ ዋርኬታን ሾጩቲዲ ኩንዲዳ፣ ሺን ጳዩቦኮ። 10 ዩሱሳ ዴዎይ ኦ አሳቴሳን ቆንጫና ሜላ ኢያ ሃይቁዋ ኡባ ዎዴ ኦ አሳቴሳን ቶኪዲ ዩዮስ። 11 ዩሱሳ ዴዎይ ሃይቁያ ኦ አሳቴሳን ቆንጫና ሜላ ፓፃ ዴዒያ ኦኒ ኢያ ጊሾ ኡባ ዎዴ ሃይቆስ አዲዲ ኢሜቶስ። 12 ሂዛ፣ ሃይቆይ ኦናን አሲያ ዎዴ ዴዎይ ሂንቴናን አሴስ።

3:13 ኪሳ 34:33 3:16 ኪሳ 34:34 * 3:18 ቤዓና፣ ማስቶቴዳ ዛሪዲ ጳሊሳና ጌቲቲ ቢርሼታናው ዳንዳዔስ። 4:6 ሜዴ 1:3 * 4:7 ሜቃ ሚሼ፣ ሃ ቤሳን ሜቃ ሚሼ ጌቲቲዳይ ቢታፊ አሴቲዳ ሚሼታ ቤሳናሳ - አቶ፣ ሻቴ፣ ቢሼ...

13 ጌሻ ማፃፋን፥ «ታ አማናስ፤ ሄሳ ጊሾ ሃሳያስ» ያይቲስ። ሄሳ ሜላ አማኖይ ኑስ ዴሲያ ጊሾ ሃሳያስ። 14 ጎዳ ዩሱሳ ሃይቆፔ ዴንሳዳ ያሳይ፥ ኑናካ ዩሱሳራ ሃይቆፔ ዴንሳዳይሳኔ ሂንቴራ ኢሲፌ ባ ሲንሴ ሺሻናይሳ ኤሮስ። 15 ሄሲ ኡባይ ሃኒዳይ ሂንቴ ጊሾሳ። ያሳ አጾ ኬሃቴሳይ ዳሮ አሳ ጋኪያ ዎዴ አሳይ ያሳ ቦንቹዋስ ዳሮ ጋላታ ኢማና።

አማኖን ዴያ

16 ሄሳ ጊሾ፥ ኑኒ ኡፋይሲ ቃንዎኮ። ኑ ቤንቲያ አሳቴሳይ ዳቡሪሼ ቢያባ ጊዲኮካ፥ ኑ አያና አሳቴሳይ ጋላስ ጋላስ አራዌስ። 17 ሃሲስ ኑኒ ዋዩቲያ ሃ ካዉሻ ዋዩይ፥ ኡባፌ ኬሂ ጊታቲያ ሜሪና ቦንቹዋ ኑስ ኢሚሳና። 18 ኑኒ ቤንቲያባ ጊዶናሺን ቤንቶናባ ዌሎስ። ቤንቲያባይ ሃሲሳ፥ ሺን ቤንቶናባይ ሜሪናሳ።

5

1 ሃሲ ኑ ዴሲያ ዱንካኔ ዳኒያ ሃ ሳዓ አሳቴሳይ ሳሌቲኮካ፥ አሲ ኬቢባና፥ ያሳይ ኬቢዳ ሜሪና ኬሳይ ኑስ ሳሎን ዴዌይሳ ኤሮስ። 2 ሳሎ አሳቴሳ ማዓናው አሞቲሼ ሃሲ ሃ ሳዓን ዴዌሼ አሎስ። 3 ኑኒ ሄሳ ሚሲያ ዎዴ ካሎቶኮ። 4 ዱንካኔ ዳኒያ ሃ ሳዓ አሳቴሳን ኑ ዴሲሼ ዴዌቲዲ አሎስ። ሃይቂያ ኑ አሳቴሳይ ዴዎን ሳሚታና ሜላ ሳሎ አሳቴሳ ማዓናው ኮዮሲፔ አቲን አሹዋፔ ሻኬታናው ኮዩዲ ጊዴና። 5 ኑና ሃይሳስ ጊጊሲዳይ ያሳ። ቃሲ ሲንሳፌ ያናባስ አይሲ አሲዲ ባ አያና ኑስ ኢሚስ።

6 ሄሳ ጊሾ፥ ኑኒ ሃ ሳዓ አሳቴሳን ዴሲያ ዎዴ ኡባን ጎዳፔ ሃኪዲ ዴዌይሳ ኤሪኮካ ኡባ ዎዴ አማኔቲዲ ዴዎስ። 7 ኑኒ ዴዌይ አማኖናፔ አቲን ቤሲያባን ጊዴና። 8 ኑ ሃ ሳዓ አሳቴሳፌ ሻኬቲዲ፥ ኑ ሶ ቢዲ ጎዳራ ኢሲፌ ዳናው አሞቲያ ጊሾ አማኔቲዲ ዴዎስ። 9 ሄሳ ጊሾ፥ ኑ ሃ አሳቴሳን ዴሲን ዎይኮ ሃ አሳቴሳፌ ሻኬቲን፥ ኑ አሞይ ኢያ ኡፋይሳናይሳ። 10 ኑኒ ኢሶይ ኢሶይ ሃ ሳዓን ዴዌሼ ሎዎ ጊዲን ዎይኮ ኢታ ጊዲን፥ አሲዳ አሱዋስ ቤሲያ ፐርዳ ኤካናው ኪሪስቶሳ ፐርዳ አራታ ሲንሳን ሺቃና።

አሴ ያሳራ ሲጌሶ

11 ሂዛ፥ ኑኒ ጎዳ ቦንቹይሲ አይ ጉሴኮ ኤሪያ ጊሾ አሳይ ኑ አዴይሳ ኤካና ሜላ ዞሮስ። ያሳይ፥ ኑኒ አኒኮ ኑና ኤሬስ፤ ቃሲ ሂንቴካ ሂንቴ ካሃን ኑ አኒኮ ኤሬታ ያጋዳ ቆፓይስ። 12 ዎዛናን ጊዶናሺን ማላን ጩቁቲያ አሳ ዶና አይሳናው ሂንቴ ኑናን

ጩቁታና ሜላ ሂንቴው ጋሶ ጊዳናው ኮዮሲፔ አቲን ኑ ኑና ዛሪዲ ናሻናው ኮዮኮ። 13 ኑ ጎሺ ጊዲኮ ሶሳ ቦንቾሳ፤ ዎዛናማ ጊዲኮ ሂንቴሳ። 14 ኢሶይ ኡባስ ሃይቂዳይሳኔ ኡባይ ቃሲ ኢያራ ሃይቂዳይሳ ኑ ኤሪያ ጊሾ ኪሪስቶሳ ሲቆይ ኑና ሃሪስ። 15 ዴዎን ዴዔይሳቲ ሂዛፔ ጉዬ ባንታው ጊዶናሺን ኤንታው ሃይቂዳይሳሲኔ ሃይቆፔ ዴንዲዳይሳስ ዳና ሜላ ኪሪስቶሲ አሳ ኡባ ጊሾ ሃይቂስ።

16 ሂዛፔ ጉዬ፥ ኑኒ ኦናካ አሳ ቆፋን ፐርዶኮ። ሃይሳፌ ካሴ ኑኒ ኪሪስቶሳካ አሳ ቆፋን ፐርዲዳባ ጊዲኮካ፥ ሂዛፔ ሄሳዳ ፐርዶኮ።

17 ሄሳ ጊሾ፥ አኒካ ኪሪስቶሳን ዴዒኮ አራሳ ሜዴቴሴ፤ ጋልዓ ሜዴቴሳይ አዲስ፤ ኡባይካ አራሳ ጊዲስ። 18 ሄሳ ኡባ ሶሳይ አሳስ። ኢ ኪሪስቶሳ ባጋራ ኑና ባራ ሲጌሳስ። ቃሲ ሃራታ ባራ ሲጌሳና ሜላ ኑስ ሲጌሳ አሶ ኢሚስ። 19 ሶሳይ ኪሪስቶሳ ባጋራ አሳ ኡባ ባራ ሲጌሳስ። ኤንታ ናጋራ ታይቢቤና፤ ቃሲ አሳ ባራ ሲጌሳያ ቃላ ኑስ ኢሚስ።

20 ሶሳይ አሳ ኑ ባጋራ ዩጊያ ጊሾ ኑ ኪሪስቶሳን ኪቴቲዲ አሳ ሶሳራ ሲጌቲቲ ጊዲ ኪሪስቶሳ ጊሾ ዎሶስ። 21 ኑኒ ሶሳ ያሎቴሳ ኪሪስቶሳ ባጋራ ኤካና ሜላ፥ ናጋራ ኤሮና ኪሪስቶሳ ኑ ጊሾ ናጋራንቾ አሳዳ አሳስ።*

6

1 ኑኒ ሶሳራ ኢሲፌ አሳያ አሲ ጊዴይሳዳ፥ ሂንቴ ኤኪዳ አዶ ኬሃቴሳ ሃዳ አሶና ሜላ ኑ ሂንቴና ዎሶስ። 2 ሶሳይ፥

«ታ ኔና ሲዓና ዎዴን ሲዓስ፤

አቶቴሳ ጋላሳን ኔና ማዳስ»

ያጌስ። ሄኮ፥ ታ ሲዒያ ዎዴይ ሃዒ፤ አቶቴሳ ጋላሳይ ሃቺ።

3 አኒካ ኑ አሱዎ ቦራና ሜላኔ ኑናን ዲቤታና ሜላ ኮዮኮ።

4 ጊዶሺን፥ ኑ ቴማ ሶሳ አሳንቾታ ጊዴይሳ ኑ አሳያ ኡባባን ቤሲዳ። ዳሮ ገንጫን፥ ዋዬን፥ ሜቶን፥ ኡንዓን፥ 5 ጋራፌቴሳን፥ ቃሾን፥ ኢዎን ኩሚዳ ዎጫማን፥ ዳቡራን፥ ዲስኮ ዳዮን፥ ዎማን፥

6 ጌሻቴሳን፥ ኤራቴሳን፥ ዳንዳዓን፥ ኬሃቴሳን፥ ጌሻ አያናን፥ ቴማ ሲቆን፥ 7 ቴማ ሃሳያኒኔ ሶሳ ዎልቃን ኑኒ ኢያ አሳንቾታ ጊዴይሳ ቤሲዳ። ቃሲ ያሎቴሳይ ኑስ ቶራኔ ጎንዳሴ። 8 ኑኒ ቦንቼቲዳኔ ቶሼቲዳ፤ ጫዬቲዳኔ ጋላቴቲዳ። ቴማ ሃሳዮስ፥ ሺን አሳይ ኑና ዎርዳንቾ ጊዶሶና። 9 ኑ አሳን ኤሬቲዳ አሲ፥ ሺን ኤሬቶና አሳ ሜላ ጊዲዳ። ሃይቂዶሶና ያጌቲዳ፥ ሺን ፓዓ ዴዎስ፤ ሾጩቲዳ፥ ሺን ሃይቂባኮ። 10 ኑኒ አዛኒኮካ ኡባ ዎዴ ኡፋይቶስ። ኑ ማንቆ

* 5:21 ናጋራንቾ አሳዳ፥ ናጋራ ያርሾ አሳስ። 6:2 ኢሳ 49:8 6:5 ሃ.አ 16:23

ዳኖስ፥ ሺን ዳሮ አሳ ዱሬዮስ። ቃሲ አይኮይካ ባይና አሲ ዳኖስ፥ ሺን ኡባይ ኑባ።

11 ቆሮንቶሳ አሳው፥ ኑ ሂንቴው ቆንጩን አዲዳ፤ ኑ ኡሉዋ ሂንቴና ቤሲዳ። 12 ሂንቴ ኑና ሂንቴ ሲቁዋ ቤሶና ዲጊዴታፔ አቲን ኑ ኑ ሲቁዋ ሂንቴና ዲጊቦኮ። 13 አዉ ባ ናይታስ አዴይሳዳ ታ ሂንቴው አዳይስ፤ ኑ ሂንቴና ኑ ኡሉዋ ቤሲዳይሳዳ፥ ሂንቴካ ሂንቴ ኡሉዋ ኑና ቤሲቴ።

አማኖና አሳራ ዴዲያ ኢሲፌቴሳ አጎ

14 አማኖና አሳራ ቤሶና አጊን ዋዪቶፊቴ። ዒሎቴሳሲኔ ናጋራስ አይቤ ጋሄቴሲ ዴዲ? ፖዖሲኔ ዱማስ አይቤ ኢሲፌቴሲ ዴዲ? 15 ኪሪስቶሳኔ ገላሄ ኢሲፌ ጋሲያባይ አይቤ? ቃሲ አማኔይሲኔ አማኖናይሲ ኢሲፌ ኮዒያባይ አይቤ? 16 ዖሳ ኬሳስ ኤቃታራ አይቤ ኢሲፌቴሲ ዴዲ? ዖሳይ፥

«ታኒ ኤንታ ጊዶን ዴዳና፥

ኤንታ ጊዶን ሃሙታና።

ታኒ ኤንታ ዖሳ ጊዳና፤

ኤንቴካ ታ አሴ ጊዳና»

ጊዳይሳዳ፥ ኑኒ ዴዖ ዖሳ ኬሲ። 17 ሄሳዳካ፥ ጎዳይ፥

«ኤንታ ጊዶፌ ሻኬቴዲ ኬዬቴ፤

ቴና ጊዲዳባ ቦቾፊቴ፤

ታ ሂንቴና ኤካና።

18 ታ ሂንቴው አዋ ጊዳና፤

ሂንቴ ታው አዴ ናይታኔ ማጫ ናይታ ጊዳና፤

ያጌስ ኡባፌ ዎልቃማ ጎዳይ» ያጊስ።

7

1 ሂዛ፥ ታ ሲቆቶ፥ ሃ ኡፋይሳይ ኑስ ዴዲያ ጊሾ ኑ አሹዋኔ ኑ ሼምፑዋ ቱኒሲያባ ኡባፌ ኑና ጌሾስ። ዖሳስ ያዩዲ ኑ ጌሻቴሳ ፖሎ አሶስ።

ጳዉሎሳ ኡፋይሳ

2 ሂንቴ ኡሉዋ ኑና ቤሲቴ። ኑኒ አናካ ናቂቦኮ፤ አናካ ቆሂቦኮ፤ አናካ ጨሚቦኮ። 3 ታኒ ሄሳ ሂንቴ ቦላ ፒርዳናው ጊኬ። ሃይሳፌ ካሴ ታ ሂንቴው አዲዳይሳዳ፥ ሂንቴ ኑ ዎዛናን ዴዴታ፤ ኑ ፓግ ዴዲንካ ሃይቂንካ ሂንቴፌ ሻኬቶኮ። 4 ታ አዲያባ ሂንቴፌ ቆቴኬ፤

6:16 ሌዌ 26:12፤ ሂዝ 37:27፤ 1ቆሮ 3:16፤ 6:19 6:17 ኢሳ 52:11
6:18 2ሳሙ 7:14፤ 1ታሪ 17:13፤ ኢሳ 43:6፤ ኤር 31:9

ታ ሂንቴናን ጩቄታይስ፤ ኑ ዋዬ ኡባን ሚኔታይስ፤ ቃሲ ጊታ ኡፋይሲ ኡፋይታይስ።

5 ኑኒ ማቄዶኒያ ቢዳ ዎዴ ኡባ ባጋራ ዋዬቲዳፕ ኣቲን ሼምፕሮኮ። ካሬራ ሞርኬታን፣ ኑ ጋላን ያሻን ኡንዔቲዳ።

6 ሺን ኣዛኒዳይሳታ ሚንሴሴያ ያሳይ፣ ቲቶ ዩሳን ኑና ሚንሴሴስ።

7 ኑና ሚንሴሴዳይ ቲቶ ዩሳ ሃላላ ጊዶናሺን ሂንቴካ ኢያ ሚንሴሴዳይሳና። ሂንቴ ታና ላሞቴይሳ፣ ታው ኣዛኒይሳኔ ታው ቆፕይሳ ታ ሲዒዳ ዎዴ ታና ዳሮ ኡፋይሲስ።

8 ታ ዳብዳቤይ ሂንቴና ኣዛንሴኮካ ኣይስ ሃፋዲናሻ ጋዳ ቂርቲኬ። ታ ቂርቲዳይ ታ ሃሬዳ ዳብዳቤይ ሂንቴና ጉላ ዎዴስ ኣዛንሴዳ ጊሾሳ። 9 ሃዒ ታኒ ኡፋይቲዳይ፣ ታ ሂንቴና ኣዛንሴዳ ጊሾ ጊዶናሺን ሂንቴ ኣዛኖይ ሂንቴና ሂንቴ ናጋራፕ ዛሪዳ ጊሾሳ። ያሳይ ባ ሸኒያዳ ሂንቴና ኣዛንሴሲፕ ኣቲን ኑ ሂንቴና ኣይቤንካ ቆሂሶኮ። 10 ያሳይ ኮያ ኣዛኖይ፣ ኣቶቴሳኮ ጋሴያ ናጋራፕ ሲሞ ኤሄስ፤ ኢያን ቂርያባይ ባሞ። ሺን ሃ ሳዓ ኣዛኖይ ሃይቆ ኤሄስ።

11 ሂንቴ ኣዛኖይ ሂንቴናን ኣይፊሲዳ ኣይፊያ ቤዒቴ። ሄ ኣዛኖይ ሂንቴና ኣይ ሜላ ዴንሴሴዳኮ፣ ኣይ ሜላ ዛሮ ኢማናዳ ጊጊሲዳኮ፣ ሄ ኡራ ቦላ ኣይ ሜላ ሃንቂሲዳኮ፣ ኣይ ሜላ ታው ያያና ሜላ ኦሴዳኮ፣ ኣይ ሜላ ኣሞዩዳኮ፣ ሄ ኡራ ሴራናው ኣይ ሜላ ጊጊዳኮ ቤዒቴ። ሃ ኡባባን ሂንቴ ንሺ ጊዴይሳ ማርካዩዴታ።

12 ሄሳ ጊሾ፣ ታኒ ሃ ዳብዳቤያ ሂንቴው ሃሬዳይ፣ ናቂዳ ኡራ ዎይኮ ናቂቲዳ ኡራ ጊሾ ጊዴና። ሺን ሂንቴ ኑስ ኣይ ሜላ ቆፕያኮ ያሳ ሲንሳን ሂንቴ፣ ሂንቴና ቤዓና ሜላ ሃፋስ። 13 ኑኒ ኡፋይቲዳይ ሄሳ ጊሾሳ። ኑ ኡፋይሳፊ ኣዲዲ ኑና ዳሮ ኡፋይሲዳይ፣ ሂንቴ ቲቶ ኡፋይሲዳይሳኔ ኢያ ዎዛና ሼምፕሲዳይሳ። 14 ታኒ ሂንቴና ናሻዳ ኢያው ኦዲን ሂንቴ ታና ዩላዩቤኬታ። ሺን ኑኒ ኡባ ዎዴ ሂንቴው ቱማ ኦዲዳ፤ ሄሳዳካ ኑኒ ቲቶ ሲንሳን ሂንቴና ናሺዳይሲ ቱማ ጊዲስ። 15 ሂንቴ ኢያው ያሻን ኮኮሪዲ፣ ኢያ ሞኪዳይሳ ቃሲ ኢያው ኣይ ሜላ ኪቴቲዳኮ ኢ ቆፕያ ዎዴ ሂንቴው ዴዒያ ሲቆይ ሚኒሼ ቢስ። 16 ታኒ ኡባባን ሂንቴናን ኣማኔቲያ ጊሾ ኡፋይታይስ።

8

ኢሞባ

1 ኑ ኢሻቶ፣ ያሳይ ማቄዶኒያን ዴዒያ ዎሳ ኪሳታስ ኢሚዳ ኣዶ ኪሃቴላ ሂንቴ ኤራና ሜላ ኑ ኮዮስ። 2 ኤንቲ ጊታ ሜቶን ፓጩቲዶስና፣ ሺን ኤንታ ኡፋይሳይ ዎልቃማ። ኤንታ

ማንቆቴሳስ ዛዊ ባዎ፥ ሺን ባንታ ኢሙዋን ዳሮ ኬሂደሶና።
 3 ኤንቲ ባንታ ዎልቃ ሜላኔ ባንታ ዎልቃፊ አደይሳ ደሲዲ ኢሚዳይሳስ ታ ማርካ። 4 ኤንቲ ዎሳ አሳ ማዲያ ሎዎ አሶ ኑራ አሳናው ኮዬዲ ኑና ዳሮ ዎሲደሶና። 5 ኤንቲ ኑኒ ቆፒዳይሳፊ አሲዲ አሲደሶና። ኮይሮቲዲ ባንታና ጎዳስ ኢሚደሶና፤ ካሊዲ፥ ዎሳ ሸኒያዳ ባንታና ኑስ ኢሚደሶና።

6 ሃ ሎዎ አሱዋ ዶሚዳ ቲቶይ ጉጂ አሳናዳኔ ሂንቴና ማዲዲ፥ ሄ አሱዋ ፖሊሳናዳ ኢያ ዎሲዳ። 7 ሺን ሂንቴ ኡባባን፥ አማኖን፥ ሃሳዎን፥ ኤራቴሳን፥ ጊታ አሞን፥ ኑና ሲቆኒኔ ኡባባን ዱሬቲዳይሳዳ ሃ ሎዎ አሱዋንካ ሂንቴ ኬሃ ጊዳና ሜላ ኑ ኮዮስ።

8 ታኒ ሄሳ ኪታናው ጊኬ። ሺን ሃራታ ጊታ አሙዋ ሂንቴ ሲቁዋራ ሄሳ ቤዓዳ ሂንቴ አይ ኬና ቱሜኮ ኤራናው ጋይስ። 9 ሂንቴ ኑ ጎዳ ዮሱስ ኪሪስቶሳ አዶ ኬሃቴሳ ኤሬታ። ኪሪስቶሲ ዱሬ ጊዲ ኡቲዲ፥ ሂንቴ ኢያ ማንቆቴሳን ዱሬታናዳ ሂንቴ ጊሾ ማንቁስ።

10 ታኒ ሃ አዳን ሂንቴና ማዲያ ዞሬ ዞራናው ኮያይስ። ሂንቴ ዘላይሲ ኢማናው 9ላላ ጊደናሺን ሄሳ አሳናው አሞቴሳንካ ሂንቴ ኮይሮ። 11 ሂንቴ አሳናው ዶሚዳ አሱዋ ሃዲ ፖሊቴ። ሂንቴ ሂንቴው ዴዔይሳ ኬና ኢሚኮ፥ ሄሲ ሂንቴ ኢማናው ዳሮ አሞቴይሳ ቆንጨሴስ። 12 ኢሲ አሲ ኢማናው አሞቲኮ፥ ኢያ ኢሞይ ዎሳ ሲንሳን ኤኬቴይ፥ ኢ ባው ዴዒዳይሳ ኬና ኢሚናፕ አቲን ባይናባፕ ኢማናው ኡንዔቲን ጊዴና።

13 ታኒ ሄሳ ጌይ፥ ሂንቴ ኡባይ ኢሲ ጊና ጊዳና ሜላሳፊ አቲን ሃራቲ ዋያፕ ሸምፒን ሂንቴ ዋዬታና ሜላሳ ጊዴና። 14 ዎዴ ኤንታ ፓላሃይ ሂንቴ ፓጫ ኩንሳና ሜላ ሃዲ ሂንቴ ፓላሃይ ኤንታ ፓጫ ኩንሶ። ሄሳን ሂንቴ ጊና ጊዳና። 15 ጌሻ ማፃፋን፥ «ዳሮ ሸሺዳይሳስ ፓላሂቤና፤ ጉላ ሸሺዳይሳስ ፓጨቤና» ጌቴቲ ሃፌቲዳይሳ ሜላ።

ቲቶኔ ኢያ ላጌታ

16 ኑ ሂንቴው ቆፕይሳዳ ቲቶይካ ሂንቴው ቆፓና ሜላ አሲዳ ዎሳይ ጋላቴቶ። 17 ቲቶይ ሂንቴኮ ቢዳይ፥ ኑ ኢያ ዴንፎሲዳ ጊሾ 9ላላ ጊደናሺን ኢ ባ ሸኔን ባናው አሞቲዳ ጊሾሳ። 18 ዎንጌላ ማርካቴሳን ዎሳ ኬሳ ኡባን ዳሮ ኤሬቲዳ ኢሻ፥ ኑኒ ቲቶራ ኢሲፊ ኪቶስ። 19 ሄሳ ቦላ ኑኒ ሃ ኬሃ ኢሞታ ኤሬያ ዎዴ ኑራ ባና ሜላ ሃ ሎዎ አሱዋን ጎዳ ቦንቻናውኔ ሃራታ ማዳናው ዴዒያ አሙዋ ቤሳናው ኢ ዎሳ ኬሳታን ደሬቲስ።

20 ሃ ኢሜቲዳ ኬሃ ኢሙዋ፥ ኑ አሶ ቦላ ፔሺያ ዎዴ ቦሬቶና ሜላ ናጌቶስ። 21 ኑኒ ጎዳ ሲንሳን ገላላ ጊዶናሺን አሳ ሲንሳንካ ሎዎ ጊዲዳባ አሶስ።

22 ቃሲ ዳሮ ዎዴ ፓጩን ሚኒዲ አዲዳ ኑ ኢሻ፥ ኤንታራ ሂንቴኮ ኪቲዳ። ኢ ሂንቴናን ኬሂ አማኔቲያ ጊሾ ሃዲ ሂንቴና ማዳናው ዳሮ አሞቴስ። 23 ቲቶባ ኤራናው ኮይኮ፥ ኢ ሂንቴና ማዳናው ታራ አሲያ ታ አሶ ላጊያ። ሃንኮ ኢሻታባ ጊዲኮ ዎሳ ኬሳቲ ኪቲዳይሳታ፤ ቃሲ አሳይ ኤንታ ዱሳ ቤዲዲ ኪሪስቶሳ ቦንቾሶና። 24 ሄሳ ጊሾ፥ ዎሳ ኬሳቲ ሂንቴ ሲቁዋኔ ኑ ሂንቴና ናሺይሲ ቱማ ጊዴይሳ ቆንጩሳናው ሂንቴ ሲቁዋ ሃ አሳታ ቤሲቴ።

9

አማኒያ አሳስ ኬሲዳ ሚሺያ

1 አማኒያ አሳስ ኬሲያ ሚሺያባ ታ ሂንቴው ገፋናው ኮሺና። 2 ሂንቴ ማዳናው ኬሂ አሞቴይሳ ታ ኤራይስ። ሂንቴ አካያ አሳይ፥ ዚላይሳሬ ዶሚዲ ማዳናው ጊጌቲዳይሳ ታኒ ማቆዶኒያ አሳስ ዶና ኩንሳዳ አዳስ። ሂንቴ ጊታ አሞይካ ኤንታፌ ዳሮታ ዴንሴሲስ። 3 ሃ አሱዋን ሂንቴናን ኑ ጩቁቲያ ጩቆይ ሃዳ ጊዶና ሜላ ኮይሮ ሂንቴባ ታ ኦዲዳይሳዳ ሂንቴ ጊጌቲዲ ናጋና ሜላ ሃ ኢሻታ ሂንቴኮ ኪታስ። 4 ማቆዶኒያ አሳይ ታራ ቤዲ፥ ሂንቴ ጊጌቶና ዴዲሺን፥ ዴሚኮ፥ ኑ ሂንቴናን ዩላታና፤ ቃሲ ሂንቴ ኑፔ አዶ ዩላታና። 5 ሄሳ ጊሾ፥ ሃ ኢሻቲ ታፔ ሲንሳቲዲ ሂንቴኮ ቤዲ፥ ሂንቴ ኢማና ጊዳ ኢሙዋ ካሴቲዲ ጊጊሳና ሜላ ታ ኤንታና ኪታስ። ታኒ ጋኪያ ዎዴ ሄ ኢሞይ ጊጊ ኡቴስ። ሄ ዎዴ ሄ ኬሃቴሳ ኢሞይ ዎልቃን ጊዶናሺን ዶሳን ጊዴይሳ ኤሪሴስ።

6 ሃይሳ አኬኪቴ፤ ጉሉ ዜሪዳይ ጉሉ ጫካና፤ ዳሮ ዜሪዳይ ዳሮ ጫካና። 7 ዎሳይ ኡፋይሳን ኢሚያ ኡራ ዶሲያ ጊሾ ዎልቃን ዎይኮ ዶሲ ባይና ጊዶናሺን ኢሲ ኢሲ አሲ ባ ዎዛናን ቆፒዳይሳዳ ዶሳን ኢማናው ቤሴስ። 8 ኡባ ዎዴ ኡባባን ኮሺያባ ኡባ ዴሚዲ ሎዎ አሶ ኡባ አሳናው ዳንዳናና ሜላ ዎሳይ ሂንቴው ባ አንጁዋ ዳርሳና። 9 ጊሻ ማግፋን፥

«ኢ ባ ሻሉዋ ማንቆታስ ላሊስ፤

ኢያ ዊሎቴሳይ ሜሪናው ዴዳና»

ያጌስ። 10 ዜራይሳስ ዜራሲ፥ ማናው ካሲ ኢሚያ ጎዳይ፥ ሂንቴ ዜሪያ ዜራሳ ዳርሲዲ ኢማና። ሂንቴ ዊሎቴሳ አይፊያካ ዳርሳና።

11 ዳሮ አሳይ ሂንቴ ኢሚያ ኢሙዋ ኑፔ ኤኪዲ፥ ያሳ ጋላታናዳ፥ ሂንቴ ኡባ ዎዴ ዳርሲዲ ኢሜይሳታ ጊዳና ሜላ ያሳይ ሂንቴና ኡባ ባጋራ ዱሬያና። 12 ሃ ሂንቴ ኢሚያ ኢሞይ አማኒያ አሳ ፓጫ ኩንሶ ሃላላ ጊዶናሺን አሳይ ያሳ ጋላታናው ጋሶ ጊዴስ። 13 ሃ ሂንቴ አሶይ ሂንቴ አማኑዋ ኤርሲዲ ኪሪስቶሳ ዎንጌላ ሂንቴ አማኒዲኔ ኢያው ኪቴቲዲ ሂንቴው ዴዲያባ ኤንታራኔ ሃራታራ ሻኬቲዳ ጊሾ ኡባይ ያሳ ቦንቻና። 14 ያሳይ ሂንቴው ኢሚዳ አዶ ኬሃቴሳ ጊሾ ኤንቲ ሂንቴው ያሳ ዎሲሼ ሂንቴና ቤዓናው ላሞቶሶና። 15 ዛዊ ባይና ያሳ ኢሙዋስ ያሳይ ጋላቲቶ።

10

ጳውሎሲ ሞቴይሳታስ ዛሪዳ ዛሩዋ

1 ታ ሂንቴራ ዴዲያ ዎዴ ሹጎ፥ ቃሲ ሂንቴፌ ሃኪያ ዎዴ ኑ ቦላ ሚኔስ ያጌቲዳ፥ ጳውሎሲ፥ ኬሃኔ አሽኪ ጊዲዳ ኪሪስቶሳ ሱንሳን ሂንቴና ዎሳይስ። 2 ታኒ ሂንቴኮ ቢያ ዎዴ ኑ አሾ ቆፋራ ሲሜሬቲያ አሲ አሲዲ ቆፒያ አሳ ቦላ ሚያ ቃሳን አዴታናው ቆፋ ቃቻስ። ሂንቴ ቦላ ሄሳዳ አዴታና ሜላ ሂንቴ ታና አሶናዳ ሂንቴና ዎሳይስ። 3 ኑኒ ሃ ሳዓን ዴዲኮካ ሃ ሳዓ አሳዳ አሌቶኮ። 4 ኑ አላ ሚሼይ ሃ ሳዓይሳ ጊዴና። ሺን ሚፃ ላላናው ዎልቃራ ዴዲያ ያሳ ቶራ። ቴማራ ኤቁቲያ ፓላማኔ፥ 5 ያሳ ኤሮና ሜላ ዲጊያ አቶሮ ቆፋ ኡባ ላሎስ። አሳ ቆፋ ኡባ ዲዲዲ ኪሪስቶሳስ ኪቴታና ሜላ አሶስ። 6 ሂንቴ ኪቴቴሳይ ፖሎ ጊዲያ ዎዴ ኑኒ ኪቴቴሳ ኢያ ኡባ ሴራናው ጊጌታና።

7 ሂንቴ አይፌይ ቤዲዳ ሜላ ፒርዴታ፥ አኒካ ባና ኪሪስቶሳባ ጊዲ ቆፒያባ ጊዲኮ፥ ኑካ ኪሪስቶሳባ ጊዴይሳ ኤሮ። 8 ጎዳይ ታው ኢሚዳ ማታን ጩቁቲኮካ ሄሳን ዩላቲኬ፥ ሄ ማታይ ታው ኢሚቲዳይ ሂንቴና ዲቻናሳፌ አቲን ቆሃናሳ ጊዴና። 9 ታኒ ታ ዳብዳቢያን ሂንቴና ያሽሳናው ኮያዳ ፃፊዳባ ዳናፖ። 10 ኢሲ ኢሲ አሳይ፥ «ጳውሎሳ ዳብዳቤይ ዴያኔ ዎልቃማ፥ ሺን ኢያ ሶምያን ቤዲያ ዎዴ ኢ ዳቡራንቾ፤ ኢያ አዳይካ ፓሴና» ያጎሶና። 11 ሄ አሳቲ ኑ ሃሆን ዴዲሼ ፃፊያ ዳብዳቢያኒኔ ማታን ሂንቴራ ዴዲሼ አሲያ አሱዋ ጊዶን ዱማቴሲ ባይናይሳ አኪኮ።

12 ኑኒ ባንታና ናሺያ አሳታራ ኑና ጊናያናው ዎይኮ ጋዴያናው ኮዮኮ። ሺን ኤንቲ ባንታና ባንታራ ጊናዬዲ ዎይኮ ጋዴዬዲ ቤዲሼ ኤያ።

13 ሺን ኑኒ ያሳይ ኑስ ኢሚዳ ዳሳን ጩቁቶሲፔ አቲን ዛዋ ፒኒዲ ጩቁቶኮ፤ ሄ ዛዋይ ሂንቴኮካ ጋኪስ። 14 ኑኒ ቤሴይሳፌ አሲዲ ጩቁቶኮ፥ ሺን ኪሪስቶሳ ዎንጌላ ሂንቴኮ ጋሲዳይሳን ጩቁቶስ። 15 ኑኒ ያሳይ ኤሲዳ ዛዋፔ ፒኒዲ፥ ሃራቲ አሲዳ አሶን

ጨቁቶኮ። ጊደሺን፣ ሂንቴ አማኖይ ዲጫና ሜላ ያሳይ ኢሚዳ ዛዋን ሂንቴ ጊደን ኑ አሲያ አሶይ ዳልጋና ጊዲ ቆፖስ።¹⁶ ኑኒ ሃራ አሲ ባ ዛዋን አሲዳ አሶን ጌሊዲ ጨቁቶኮ፣ ሺን ሂንቴፌ ፒኒዲ ሃራታስ ዎንጌላ ማርካታናው ዳንዳዎስ።¹⁷ ሺን፣ ጌሻ ማፃፋን፣ «ጨቁቶ ኡባይ ጎዳ ሎዎቴሳን ጨቆ» ያጊዲ ፃፌቲስ።¹⁸ ጎዳይ ናሺያ ኡራፔ አቲን ባና ባው ናሺያ ኡራይ ናሺቴና።

11

ጳውሎሳኔ ዎርዳንቾ ሃዋሬታ

¹ ታ ጉሳ ኤያቴሳ ሂንቴ ሃዲካ ዳንዳናና ጋዳ ቆፓይስ፤ ሃያና ዳንዳዲቴ።² ያሳይ ሂንቴው ቆፒዳይስሳዳ፣ ታካ ሂንቴው ቆፓይስ። ታኒ ሂንቴና ጌሻ ጌላዲዳ አሲ አዲያ፣ ኪሪስቶሳስ ኢማናው አይቻ ዎሳስ።

³ ሺን ሾሻይ ባ ጌኒያን ሄዋኖ ባሌሲዳይሳዳ አኒ ኤሪ ሂንቴ ዎዛናይ ኢቲዲ ኪሪስቶሳስ ዴዲያ ሂንቴ ሱሬቴሳኔ ጌሻቴሳ አጋንዴቲ ጋዳ ሂርጋይስ።⁴ አሲ አሲ ዩዲ፣ ኑኒ ሂንቴው ማርካቲዳ ዩሱሳፔ ሃራ ዩሱሳ ሂንቴው ማርካቲኮ፣ ዎይኮ ሂንቴ ኤኪዳ አያናፔኔ ዎንጌላፔ ሃራ አያናኔ ዎንጌላ ሂንቴው አዲኮ፣ ሲዲ ጊዲ ኤኬታ።

⁵ ሺን ታኒ ዩሱስ ኪቲዳ «ጊታ ሃዋሬታፔ» ጉፃይስ ጋዳ ቆፒኬ።⁶ ታኒ አዳ ኤሮና አሲ ጊዲኮካ፣ ኤራቴሲ ታው ዴዴስ። ሄሳ ታ ሂንቴው ዳሮ አጌን ቆንጨሳስ።

⁷ ታኒ ሚሼ አይቾና ያሳ ዎንጌላ ሂንቴው ጮ አዲዳይሲኔ ሂንቴና ጰቁ አሳዳ ታና ቶቺዳይሲ ታው ናጋራ ጊዲ?⁸ ታኒ ሂንቴው አሳናው ሃራ ዎሳ ኬሳታፔ ሚሼ ቦንቃ ኤካስ።⁹ ታ ሂንቴራ ዴዲያ ዎዴ ታና ሜቲንካ ሂንቴፌ አሲ አሲካ ዋይሳቢኬ። ማቄዶኒያፔ ዩዳ አማኔይሳቲ ታና ኮሺያባ ኡባን ማዲዶሶና። ሃቺ ጋካናው ታ ሂንቴው ቶሆ ጊዳቢኬ ሲንሳስካ ቶሆ ጊዲኬ።¹⁰ ኪሪስቶሳ ቱማቴሳይ ታናን ዴዲሺን፣ ታ ጨቁዋ አካያ ቢታን ታና አኒካ ዲጌና።¹¹ ታ ሃይሳ አይስ ጋይና? ሂንቴና ዶሶና ጊሾሴዬ? ታኒ ሂንቴና ዶሴይሳ ያሳይ ኤሬስ።

¹² «ኑካ ሂንቴ ሜላ አሶስ» ያጊዲ ጨቁቶ ሃንኮ ሃዋሬታ ጨቁዋ ጋሱዋ ዳይሳናው ሃዲ ታ አሴይሳ ሲንሳስካ አሳና።¹³ ሃይሳ ሜላ አሳቲ ኪሪስቶሳ ሃዋሬ ዳናናው ባንታና ላሚያ ዎርዳንቾ ሃዋሬታኔ ጨሚያ አሳንቾታ።¹⁴ ሄሲ ማላሊሲያባ ጊዴና፤ አይስ ጊኮ፣ ፃላሄይ ፖዎ ኪታንቾ ዳናናው ባና ላሜስ።¹⁵ ሄሳ ጊሾ፣ ፃላሄ

2 ቆሮንቶሳ 11:16 14 2 ቆሮንቶሳ 11:33

አሳንቾቲ ዊሎቴሳ አሳንቾታ ዳናናው ባንታና ላሚኮ ሄሲ ጊታባ ጊዴና። ኤንቲ ዉርሴሳን ባንታ አሱዋዳ ኤካና።

ጳውሎሳ ጋኪዳ ሜቱዋ

16 እኒካ ታና ኤያ ጊዲ ቆፖና ሜላ ዛራዳካ አዳይስ። ታ ሂንቴው ኤያ ዳኒኮካ ታ ጉሳራ ጨቁታና ሜላ ታና ኤያ አሲዲ ኤኪቴ።
17 ታኒ ሃይሳዳ ጨቁታዳ አዴቴይ፤ ጎዳይ ኮዬይሳዳ ጊዶናሺን ኤያቴሳን አዳይስ። 18 ዳሮ አሳይ ሃ ሳዓባን ጨቁቲያ ጊሾ ታካ ጨቁታና። 19 ሂንቴ ዎዛናማ ጊዲያ ጊሾ ኤያ አሳባ ኡፋይሳን ዳንዳዔታ። 20 እኒካ ሂንቴና አይሌይኮ ዎይኮ ሂንቴና ቦንቂኮ ዎይኮ ባው ማዴታናው ሂንቴኮ ሺቂኮ ዎይኮ ሂንቴ ቦላ አቶርቲኮ ዎይኮ ሂንቴና ባቂኮ ሂንቴ ዳንዳዔታ። 21 ኦኒ ሄሳ አሳናው ዳሮ ዳቡራንቾ ጊዴይሳ ዬላታሺ ታ አዳይስ።

ሺን እኒካ ሚኒዲ ጨቁቲኮ፤ ታካ ጨቁታናው ሚናይስ። ታኒ ሄሳ ኤያ አሳዳ አዴታይስ። 22 ኤንቲ ኢብራዌ? ታካ ኢብራዌ። ኤንቲ ኢስራዔል? ታካ ኢስራዔል። ኤንቲ አብራሃሜ ሼሼ? ታካ አብራሃሜ ሼሼ። 23 ኤንቲ ኪሪስቶሳ አሳናቾ? ታኒ ጎሻ አሳዳ አዳይስ፤ ኤንታፌ አዲያ ኪሪስቶሳ አሳናቾ። ታኒ አሶን ዳሮ ዳቡራስ፤ ዳሮ ዎዴ ቃሼታስ፤ ጋራፌታስ፤ ዳሮ ዎዴ ሃይቆፕ አታስ። 24 አይሁዴቲ ታና ሃስታማኔ ኡዱፋና ኢቻሹ ቶሆ ጋራፊዶሶና። 25 ሄሹ ቶሆ ፃምዓን ሾጩታስ፤ ኢሲ ቶሆ ሹቻን ጫዴታስ፤ ማርካቤይ ሄሹ ቶሆ ሜዒስ፤ አባ ጊዶን ኢሲ ቃማ ኩሜሲ አቃዳ ፔዓስ። 26 ታኒ ዳሮ አጊያ ዳቡራን ሃውታስ። ኪፃ ሃሳፌኔ ፓንጋፌ አታስ። አይሁዴቲኔ አይሁዴ ጊዶና አሳይ ታ ቦላ ሜቶ ጋሲዶሶና። ካታማይ፤ ባዞይ፤ አባይ፤ ታና ያሺስ፤ አማኒያ ዳኒያ አሳቲ ታና ዋይሲዶሶና። 27 ታኒ አሶን ዳቡራሲኔ ጫዋታስ፤ ዳሮ ቶሆ ዲስኮ ዳያስ፤ ኮሻታስ፤ ሳሞታስ፤ ዳሮ ቶሆ ዎማስ፤ ሜጊታስ፤ ካሎታስ።

28 ሃራባ ኡባ ታይቦና ኡባ ዎዴ ታና ቆፊሴይ ዎሳ ኬሳታባ።
29 ኢሲ አሲ ዳቡሪያ ዎዴ ኢያራ ታ ዳቡራቢኪና? ኢሲ አሲ ናጋራን ዱቤቲያ ዎዴ ታ አዉዴ ቂሮቶና አጋዲና?

30 ታ ጨቁታናው ኮሺያባ ጊዲኮ ታኒ ዳቡራንቾ ጊዴይሳ ኤሪሲያባን ጨቁታና። 31 ሜሪናው ቦንቼቲዳ ዎሳይ፤ ኦ ጎዳ ዬቡስ ኪሪስቶሳ አዋይ፤ ታ ዎርዶቶናይሳ ኤሬስ። 32 ዳማስቆ ካታማን አሬታሳ ጊያ ካዉዋፕ ጋርሳራ ሃሬይሲ ታና አይሳናው ኮዬዲ ዳማስቆ ካታማ ፔንጊያ ናጊሲስ። 33 ሺን አሳይ ታና ዳቾን

11:23 ሃ.አ 16:23 11:24 ዛሬ 25:3 11:25 ሃ.አ 16:22፤ 14:19 11:26 ሃ.አ 9:23፤ 14:15 11:32 ሃ.አ 9:23-25

ዩጊዲ፥ ካታማ ዲርሳ ማስኮቲያራ ዎዲሲን ታኒ ኢያ ኩሺያፕ ኣታስ።

12

ጳውሎሳ ቆንጮሳ

¹ ጩቄቴሳስ ጎዲ ባይናይሳ ኤራይስ። ሺን ጩቄታናው ኮሺኮ፥ ጎዳፕ ኤኪዳ ቆንጮሳን ጩቃና። ² ታማኔ ኦይዱ ላይሳፌ ካሴ፥ ኪሪስቶሳ አማኒያ ኢሲ ኡራይ ሄቫንሶ ሳሎዋ ቢዳይሳ ታ ኤራይስ። ሄ ኡራይ አሾን ዎይኮ አሾፕ ካሬራ ቢዳኮ ታ ኤሪኬ፤ ዎሳይ ኤሬስ። ³ ሄ ኡራይ ሄቫንሶ ሳሎዋ ኤኬቲዳይሳ ኤራይስ። ሺን ኢ አሾን ዎይኮ አሾፕ ካሬራ ኤኬቲዳኮ ታ ኤሪኬ፤ ዎሳይ ኤሬስ። ⁴ ሄ ኡራይ ጋናቴ ኤኬቲዲ አሲ ቆንጩሳናውኔ አሲ አዳናው ዳንዳዎናባ ሲዲስ። ⁵ ታኒ ሄ አዲያባን ጩቄታና፥ ሺን ታኒ ታ ዳቡራፕ አቲን ታናን ጩቄቲያባይ ባዋ። ⁶ ታኒ ቱማ ኦዴቲያ ጊሾ ጩቄታናው ኮይኮካ ኤያ ጊዲኬ። ሺን አሲ ታ ኦሴይሳ ቤዔይሳፌኔ ሲዔይሳፌ አሲዲ ቆፖና ሜላ ጋዳ ጩቄቴሳ አጋይስ።

⁷ ታው ቆንጩዳ ጊታ ቆንጮሳን ታ አቶርቶና ሜላ ታና ዎይሳናው ታ አሾዋን ጫዲያ ፃላሂያ ኪታንቾይ ታው ኢሜቲስ። ⁸ ሃ ዎይሲያባ ታፕ ዲጋና ሜላ ታኒ ጎዳ ሄቭ ቶሆ ዎሳስ። ⁹ ሺን ጎዳይ፥ «ታ ዎልቃይ ኔ ዳቡራን ቆንጩያ ጊሾ ታ አዶ ኬሃቴሳይ ኔው ጊዳና» ያጊስ። ኪሪስቶሳ ዎልቃይ ታናን ቆንጫና ሜላ ታ ዳቡራን ኡፋይታሼ ጩቄታይስ። ¹⁰ ታኒ ኪሪስቶሳ ጊሾ ዳቡሪያ ዎዴ ጫዬቲያ ዎዴ ዋዬቲያ ዎዴ ጎዴቲያ ዎዴ ሜቶቲያ ዎዴ ታ ዳቡራን ኡፋይታይስ። አይስ ጊኮ፥ ታ ዳቡሪያ ዎዴ ሄ ዎዴ ሚናይስ።

ጳውሎሲ ቆሮንቶሳ አሳስ ቆፕስ

¹¹ ታኒ ኤያ አሳዳ ጩቄታስ። ሄሳዳ ታ ጩቄታና ሜላ ኦሲዳይ ሂንቴና። ታ፥ ታ ሁዔን ኤሬቶና አሲ ጊዲኮካ፥ «ጊታ ሃዋሬታ» ጌቴቴይሳታፕ ጉጊኬ። ሄሳ ታው ማርካታናው ቤሴይ ሂንቴናሺን። ¹² ታ ሂንቴ ጊዶን ዴዓሼ ዳንዳዓን አሲዳ ማላታቲኔ ማላቲ ታ ቱማ ሃዋሬ ጊዴይሳ ቤሶሶና። ¹³ ታ ሂንቴው ቶሆ ጊዶናይሳፌ አቲን ሃራ ዎሳ ኬሳታፕ ሂንቴ አይቢን ጉጊዴቲ? ሄሲ ባላ ጊዲኮ ታና ማሪቴ።

¹⁴ ታኒ ሂንቴኮ ባናው ጊጌቲሺን ሃይሲ ታው ሄቫንሶ። ታ ሂንቴናፕ አቲን ሂንቴው ዴዒያባ ኮዮና ጊሾ ሂንቴና ዎይሳናው ኮዩኬ። ዩሊዳይሳቲ ባንታ ናይታስ ቫሎ ሚንጆሶናፕ አቲን ናይቲ ባንታና ዩሊዳይሳታስ ቫሎ ሚንጆኮና። ¹⁵ ታ ሂንቴ ጊሾ ታው

ዴዲያባኔ ታና አላ ኢሚንካ ታና ኡፋይሴስ። ያቲን፥ ታኒ ሂንቴና ሄሳዳ ኬሃ ሲቂያ ዎዴ ሂንቴ ታና ጉሳራ ሲቂቲ?

16 ጊዲኮካ፥ ታ ሂንቴው ቶሆ ጊዲኬ፤ ዋይሳቢኬ፤ ሺን ሂንቴና ጨዋኒኔ ጌኔን አይኪዳባ ሂንቴው ዳኖና አጌና። 17 ሃሪ አቶሺን፥ ታ ሂንቴኮ ኪቲዳ አሳታፔ ሂንቴና ጨሚዳ አሲ ዴዲ? 18 ቲቶይ ሂንቴኮ ባና ሚላ ታኒ ዎሳስ፤ ቃሲ አማኒያ ኢሻካ ኢያራ ዩዳስ። ያቲን፥ ቲቶይ ሂንቴና ጨሚዴ? ኑኒ ኑ አሱዋ ኢሲ አያናን አሲባኮ? ቃሲ ኑ ሃኖይካ ኢሲኖ ጊዴኔ?

19 ኑ ኡባ ዎዴ ሂንቴ ሲንሳን ኑና ሂሊሳናው ሞቴቲያባ ሂንቴው ዳኒ? ኑ ኪሪስቶሳን ዴዲዲ ያሳ ሲንሳን ሃዲ ጋካናው አዶስ። ኑ ሲቆ ኢሻቶ፥ ኑ ሃ ኡባ አሴይ ሂንቴና ዲቻናሳ። 20 ታ ሂንቴኮ ቢያ ዎዴ አኒ ኤሪ ሂንቴ ታ ኮዩይሳዳ ሃኖና፥ ቃሲ ታካ ሂንቴ ኮዩይሳዳ ሃኖና ጋሄቶና አጎኮ ጋዳ ያያይስ። ቃሲ አኒ ኤሪ ሂንቴ ጊዶን ፓላሚ፥ ቃናቴይ፥ ሃንቆይ፥ ዩቄይ፥ ዜጊርሲ፥ አሳ ሱንሱ ኢሲይ፥ አቶርይኔ ካቺ ዶና አጌና ጋዳ ያያይስ። 21 ታኒ ናምዓንሶ ሂንቴኮ ቢያ ዎዴ ያሳይ ሂንቴ ሲንሳን ታና ካዉሻና ጋዳ ያያይስ። ካሴ ናጋራ አሲዲ ሄ ባንታ አሲዳ ቴናቴሳፌ፥ ሳይማቴሳፌኔ ዩላያ አሱዋፔ ሲሚቦና አሳታ ቤዓዳ አዛኖና አጊኬ ጋዳ ያያይስ።

13

ዉርሴሳ ዞሬኔ ሳርሶ

1 ታ ሂንቴኮ ቢሺን ሃይሲ ሄቫንሶ። አይ ሞቶይካ ናምዑ ዎይኮ ሄቭ ማርካን ሚኔስ። 2 ታኒ ናምዓንሶ ሂንቴራ ጋሄቲዳ ዎዴ ሂንቴ ጊዶን ካሴ ናጋራ አሲዳ ኡራኔ ሃራታ ኡባ ሴርና አጊኬ ጋዳ አዳ ዎሳስ። ሃዲ ታ ሃካዳ ዴዲኮካ ሲማዳ ሂንቴኮ ቢያ ዎዴ አዴስካ ቃዴቴኬ።

3 ታናን ዴዲዲ አዴይ ኪሪስቶሳ ጊዴይሳ ሂንቴ ኤራናው ኮዩታ። ኢ ሂንቴራ ሃሳያ ዎዴ ዎልቃማፔ አቲን ሂንቴ ጊዶን ዳቡራንቾ ጊዴና። 4 ኪሪስቶሲ ማስቃሊያ ቦላ ዳቡራን ካቂቲስ፥ ሺን ያሳ ዎልቃን ዴዎን ዴዴስ። ኢ ዳቡራንቾ ጊዴዳይሳዳ፥ ኑካ ዳቡራንቾ። ሺን ሂንቴና ሃጋዛናው ያሳ ዎልቃን ኢያራ ዴዎን ዳና።

5 አማኖን ሚኒዲ ዴዲያኮ ሂንቴና ሂንቴው ፓጩ ቤዲቲ። ፓጩን ሂንቴ ኩንዶና አቲኮ፥ ኪሪስቶሲ ሂንቴናን ዴዴይሳ ሂንቴ ኤራታ። ሺን ኪሪስቶሲ ሂንቴናን ዶና ኢዲኮ ሂንቴ ኩንዴታ። 6 ኑኒ ፓጩን ኩንዶናይሳ ሂንቴ ኤራታ ጋዳ አማናይስ።

13:1 ዛሬ 17:6፤ 19:15

⁷ ሂንቴ ኢታባ አሶና ሜላ ኑኒ ያሳ ዎሶስ። ኑኒ ሚኖ ጊዴይሳ አሳይ ቤዓና ሜላ ጊድናሺን ኑኒ ሚኖ ጊድና ኢቢኮካ፣ ሂንቴ ሎዎ አሳና ሜላ ኑኒ ዎሶስ። ⁸ ኑኒ ቱማስ አሶሲፔ አቲን ቱማራ ኤቁቲያባ አይባካ አሶኮ። ⁹ ኑ ዳቡሪያ ዎዴ ሂንቴ ቃሲ ሚኒያ ዎዴ ኑና ኡፋይሴስ። ሂንቴ ቦሬይ ባይናይሳታ ጊዳና ሜላ ኑ ሂንቴው ያሳ ዎሶስ።

¹⁰ ታኒ ሂንቴፌ ሃካዳ ዴዓሼ ዓፊዳይ ሄሳ ጊሾሳ። ታኒ ሂንቴኮ ቢያ ዎዴ ጎዳይ ታው ኢሚዳ ማታን ዜምፓዳ ሂንቴ ቦላ ጎዳታናው ኮዩኬ። ጎዳይ ታው ማታ ኢሚዳይ፣ ሂንቴና ማዳናሳፌ አቲን ቆሃናሳ ጊዴና።

¹¹ ዉርሴሳን ታ ኢሻቶ፣ ሳሮ ዴዒቴ። ቦሬይ ባይና ዴዒቴ፤ ታ ዞሪያ ሲዒቴ። ኢሲ ዎዛናን ጊዲዲ ዴዒቴ፤ ሳሮቴሳን ዴዒቴ። ሲቆኔ ሳሮ ኢሚያ ያሳይ ሂንቴራ ጊዶ።

¹² ጌሻ ዩሬቴሲ ዩሬቲሼ፣ ኢሶይ ኢሱዋ ሳሮሲቴ። ¹³ ያሳ አሳ ኡባይ ሂንቴና ሳሮ ሳሮ ያጎሶና።

¹⁴ ጎዳ ዩሱስ ኪሪስቶሳ አጵ ኬሃቴሳይ፣ ያሳ ሲቆይ፣ ጌሻ አያና ኢሲፌቴሳይ ሂንቴ ኡባራ ጊዶ።

አራሳ ጫቁዋ ጎፋሉ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

